



Proxecto de Decreto/2019, do de....., polo que se desenvolve o réxime de concerto para a prestación de servizos sociais no ámbito da Comunidade Autónoma de Galicia.

A Constitución española, no seu artigo 148.1.20º, establece que as comunidades autónomas poderán asumir competencias en materia de asistencia social.

En virtude do citado precepto, o Estatuto de autonomía de Galicia, no seu artigo 27.23, recolle a competencia exclusiva da Comunidade Autónoma de Galicia en materia de asistencia social.

A competencia exclusiva da comunidade autónoma na materia desenvolveuse mediante a Lei 13/2008, do 3 de decembro, de servizos sociais de Galicia, que ten por obxecto estruturar e regular como servizo público os servizos sociais de Galicia para a construción do Sistema galego de benestar. Con esta finalidade a norma configura un sistema de servizos sociais que atende aos trazos propios da sociedade galega. Para o cal precisase realizar a incorporación continua dos novos enfoques das políticas sociais que responden aos cambios que se están a producir nas familias e as persoas como consecuencia do envellecemento, a crise demográfica, a crise da familia tradicional extensa, o aumento da vulnerabilidade social e outras circunstancias.

Neste proceso de adaptación permanente a Lei 8/2016, do 8 de xullo, pola que se modifica a Lei 13/2008, do 3 de decembro, de servizos sociais de Galicia introduce, no título II desta última, o concerto social como forma de prestación de servizos sociais.

A exposición de motivos da norma modificativa remite á liberdade que a Directiva 2014/24/UE do Parlamento Europeo e do Consello, do 26 de febreiro de 2014, sobre contratación pública e pola que se derroga a Directiva 2004/18/CE, recoñece aos estados membros e aos poderes públicos para prestar por si mesmos ou organizar os servizos sociais de modo que non sexa necesario formalizar contratos públicos, sempre que o dito sistema garanta unha publicidade suficiente e se axuste aos principios de transparencia e non discriminación. A mesma norma reitera esta potestade dos estados membros para organizar a prestación dos servizos sociais obrigatorios ou de calquera outro servizo, como os servizos postais, os servizos de interese económico xeral ou os servizos non económicos de interese xeral, ou unha combinación de ambos, así como definir o seu ámbito de aplicación e as características do servizo. De forma similar a Directiva recoñece a posibilidade dos estados membros de definir, de conformidade co dereito da Unión, o que consideran servizos de interese económico xeral, como deben organizarse, financiarse e a que obrigas específicas deben estar suxeitos.

Todas estas consideracións foron incorporadas ao noso marco normativo coa transposición das directivas de contratación que realizou a Lei 9/2017, do 8 de



novembro, de contratos do sector público. En particular, debe destacarse a exclusión do ámbito obxectivo da normativa en materia de contratación da prestación dos servizos sociais por entidades privadas, realizada sen necesidade de subscribir contratos públicos, por distintos medios e sempre que o sistema empregado garanta unha publicidade suficiente e se axuste aos principios de transparencia e non discriminación. Así mesmo, na disposición adicional cuadraxésimo novena da Lei recollese a posibilidade que as comunidades autónomas, no exercicio das competencias que teñen atribuídas, lexislen articulando instrumentos non contractuais para a prestación de servizos públicos destinados a satisfacer necesidades de carácter social.

Nesta liña a Lei galega de servizos sociais incorpora o concerto social como unha modalidade contractual diferenciada do concerto xeral recollido na norma xeral de contratos do sector público. Con isto dótase a administración autonómica dun novo mecanismo que permite impulsar as súas relacións coas entidades prestadoras de servizos sociais e acadar unha maior seguridade xurídica nas actividades económicas deste sector. A súa vez o establecemento de concertos incorporará na provisión dos servizos sociais os principios de atención personalizada e integral, arraigo da persoa no entorno de atención social, elección da persoa e continuidade na atención no seu ciclo de vida e calidade.

O desenvolvemento legal da figura do concerto social recóllese nos artigos 33 bis a 33 septies da Lei 13/2008, do 3 de decembro, dentro do título II que regula a prestación dos servizos sociais. Ademais do réxime xurídico do concerto social figuran establecidos de xeito amplo o obxecto, os efectos, os requisitos esixidos para acceder a este réxime, a duración, modificación, renovación e extinción, así como os requisitos da súa formalización. En todos estes artigos derívase ao desenvolvemento regulamentario para a concreción de todos estes extremos.

O presente decreto ten por obxecto o desenvolvemento das prescricións legais para o establecemento do procedemento, as especificacións e condicións básicas para a execución dos concertos sociais dentro da submisión ao dereito administrativo e a normativa de servizos sociais. O contido do regulamento divídese en oito capítulos que recollen: disposicións xerais, réxime para concertar, procedemento de concertación, a regulación da execución, a modificación e prórroga, a extinción do concerto social, o réxime económico e a resolución de conflitos e xurisdición.

A tramitación desta disposición ven precedida da consulta á cidadanía e durante a instrución deuse audiencia e información ás entidades que puideran resultar afectadas por ela. Así mesmo, solicitáronse os informes preceptivos de conformidade coa Lei 16/2010, do 17 de decembro, de organización e funcionamento da Administración xeral e do sector público autonómico de Galicia.



Na súa virtude, por proposta da conselleira de Política Social, de acordo co Consello Consultivo / oído o Consello Consultivo, e logo de deliberación do Consello da Xunta na súa reunión do día XX de XXXXXX de dous mil XXXXXX,

DISPOÑO:

CAPÍTULO I

Disposicións xerais

Artigo 1. *Obxecto*

1. O presente decreto ten por obxecto a regulación do réxime de concerto social en desenvolvemento do previsto na lexislación de servizos sociais de Galicia.
2. De conformidade co establecido no artigo 33bis.2 da Lei 13/2008, do 3 de decembro, de servizos sociais de Galicia, enténdese por concerto social o instrumento por medio do cal se produce a prestación de servizos sociais de responsabilidade pública a través de entidades, cuxo financiamento, acceso e control sexan públicos.

Artigo 2. *Ámbito de aplicación*

O presente decreto será de aplicación aos concertos que realice a administración xeral da Comunidade Autónoma de Galicia, a través da Consellería competente en materia de servizos sociais, e o sector público autonómico, a través das entidades instrumentais adscritas á mesma, con entidades que ofrezan servizos sociais previstos nas carteiras de servizos vixentes que se determinen.

Artigo 3. *Principios*

1. Ademais dos principios recollidos no artigo 4 da Lei 13/2008, do 3 de decembro, e de conformidade co seu artigo 33bis.4, o establecemento de concertos para a provisión de servizos sociais rexeráse polos seguintes:
 - a) Atención personalizada e integral: a acción concertada estará orientada a provisión daqueles servizos que melloren a calidade de vida e benestar das persoas usuarias, partindo do respecto pleno a súa dignidade e dereitos.
 - b) Elección da persoa do centro e prestador do servizo: as preferencias e intereses das persoas usuarias serán, dentro do posible, o criterio prioritario para a asignación do prestador do servizo.
 - c) Continuidade e regularidade na atención ó longo do ciclo vital: a prestación dos servizos realizarase coa continuidade e regularidade que a persoa usuaria



precise adaptándose permanentemente ás circunstancias cambiantes do seu proceso.

d) Arraigo da persoa no entorno de atención social: os vínculos das persoas usuarias co entorno social e profesional no que recibe a atención social deberán terse en conta na continuidade da prestación dos servizos concertados.

e) Subsidiaridade: a provisión de servizos sociais mediante concerto con entidades estará subordinada, con carácter previo, a óptima utilización dos recursos propios da administración.

f) Igualdade na atención: garantindo que a atención que se preste ás persoas usuarias dos concertos sexa realizada en igualdade con aquelas que son atendidas de forma directa pola administración.

g) Calidade da prestación: os servizos prestados mediante concerto deberán cumprir cuns estándares mínimos de calidade técnica, organizativa e interpersonal, que sexan percibidos polas persoas usuarias e permitan a súa avaliación e control por parte da administración.

h) Proximidade: á poboación de referencia para procurar a prestación de servizos nun ámbito preto do lugar de vida habitual das persoas usuarias.

i) Eficiencia orzamentaria: o cálculo das compensacións económicas ás entidades que presten servizos sociais a través de concerto realizarase sobre unha análise previa, obxectiva e transparente que permita determinar o nivel necesario para dar cobertura os custos, tanto fixos como variables, da prestación dos servizos.

2. Nos procedementos de concertación garantirase o respecto ós principios de publicidade, transparencia, libre concorrencia, igualdade de trato e non discriminación.

Artigo 4. *Ámbito obxectivo*

1. Os concertos sociais que efectúe a consellería competente en materia de asistencia social e as súas entidades instrumentais comprenderán aos ámbitos dos servizos sociais previstos:

a) Na área de servizos específicos da carteira de servizos sociais de familia, infancia e adolescencia.

b) Na carteira de servizos sociais de inclusión

c) Na carteira de servizos específicos para a promoción da autonomía persoal e a atención ás persoas en situación de dependencia.

2. De conformidade co previsto no artigo 33ter da Lei de servizos sociais de Galicia, poderán ser obxecto do concerto social:



a) A reserva e ocupación de prazas para uso exclusivo das persoas usuarias de servizos sociais ou de colectivos vulnerables, cuxo acceso fora autorizado polas administracións públicas mediante a aplicación dos criterios previstos na normativa das administracións competentes.

b) A xestión integral de prestacións técnicas, tecnoloxías de servizos, programas ou centros.

3. O obxecto dos concertos sociais deberá ser concreto e determinado, debendo especificarse adecuadamente os servizos e prestacións que comprenden, con referencia á normativa que os regule.

4. O acceso dos usuarios ás prazas concertadas con entidades prestadoras de servizos sociais será, en todo caso, a través do órgano administrativo competente da administración concertante.

Artigo 5. Ámbito subxectivo

Poderán subscribir concertos coa consellería competente en materia de servizos sociais ou os seus entes instrumentais as persoas físicas ou xurídicas legalmente recoñecidas como tales, que desenvolvan prestacións, programas, servizos ou xestionen centros nos ámbitos obxecto do concerto social que se convoque e cumpran cos requisitos esixidos no capítulo seguinte.

CAPÍTULO II

Réxime para concertar

Artigo 6. *Requisitos esixidos ás entidades para concertar*

Para poder acollerse ao réxime de concerto social as entidades que presten servizos sociais deberán cumprir os requisitos seguintes:

a) Estar debidamente inscritas no Rexistro único de entidades prestadoras de servizos sociais da Comunidade Autónoma de Galicia.

b) Contar coa oportuna autorización administrativa dos seus centros e coa tramitación da oportuna autorización, declaración responsable ou comunicación previa dos seus servizos, en función do réxime de intervención previsto na lexislación vixente.

c) De ser o caso, contar coa correspondente acreditación administrativa dos servizos prestados.

d) Na convocatoria do concerto social poderase esixir aos participantes que acrediten a súa solvencia económica e financeira e técnica ou profesional, así como unha experiencia mínima de atención ó colectivo destinatario do obxecto do concerto.



e) Estar ao corrente no cumprimento das obrigas tributarias e coa Seguridade Social impostas pola lexislación vixente.

f) Cando o obxecto do concerto consista en servizos que, de acordo coa normativa vixente, deban prestarse nun espazo físico determinado, deberá acreditarse a titularidade do centro ou a dispoñibilidade por calquera título xurídico válido por un período non inferior ó da vixencia do concerto, así como, no seu caso, a autorización da entidade ou persoa titular do local onde se atopa o centro e/ou se prestan os servizos.

g) Estar en condicións de acreditar o cumprimento da normativa que, con carácter xeral ou específico, lle sexa aplicable, tanto pola natureza xurídica da entidade como polo tipo de servizo obxecto do concerto.

h) Contar cun seguro de responsabilidade civil.

Os requisitos dos apartados a), b) e c) serán comprobados de oficio polo órgano competente para a formalización do concerto social.

Artigo 7. Prohibicións para concertar

1. A consellería competente en materia de servizos sociais ou os seus entes instrumentais non poderán concertar coas entidades prestadoras de servizos sociais nas que conorra algunha das circunstancias seguintes:

a) que a entidade se atope nalgunha das circunstancias previstas como causa de prohibición de contratar recollidas no artigo 71 da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

b) que a entidade fose sancionada coa prohibición de acceder ao financiamento público da Xunta de Galicia segundo o establecido no artigo 83 da Lei 13/2008, do 3 de decembro, polo tempo que dure dita sanción.

c) que a entidade non se atope ao corrente do pagamento de obrigas por reintegro de subvencións. Considerarase que se atopa ao corrente cando as débedas estean aprazadas, fraccionadas ou se acordase a súa suspensión con ocasión da impugnación de tales débedas.

d) terse resolto ou non formalizado un concerto anterior nos últimos catro anos coa mesma entidade por causas imputables á solicitante.

2. As prohibicións recollidas no número anterior tamén afectarán a aquelas entidades das cales, por razón das persoas que as rexen ou doutras circunstancias, se poida presumir que son continuación ou que derivan, por transformación, fusión ou sucesión, doutras entidades nas que concorresen aquelas.



Artigo 8. *Duración dos concertos*

1. De acordo co artigo 33 sexies da Lei 13/2008, do 3 de decembro, os concertos sociais terán que establecerse preferiblemente sobre unha base plurianual a fin de garantir a estabilidade na súa provisión.
2. A duración inicial dos concertos sociais non superará os catro anos.
3. Cando a convocatoria do concerto social así o prevea, o concerto poderá prorrogarse ata acadar un máximo de dez anos. A duración de cada unha das prórrogas non poderá exceder a duración máxima indicada no número anterior.
4. Só mediante acordo do Consello da Xunta poderá superarse o límite dos catro anos para a duración inicial e as prórrogas dos concertos.
5. Ó remate do concerto social a administración poderá convocar un novo concerto.

CAPÍTULO III

Procedemento de concertación

Artigo 9. *Modalidades de concertación*

1. A consellería competente en materia de servizos sociais ou os seus entes instrumentais poderán convocar procesos para concertar a prestación de servizos sociais da súa competencia mediante procedementos de asignación de concertos ou a articulación de concertos de adhesión.
2. Nos procedementos de asignación de concertos procederase a seleccionar aos prestadores do servizo e o número de prazas, as prestacións ou programas que cada un deles prestará durante a duración do concerto, de acordo cos criterios de selección e preferencia da convocatoria.

A asignación de concertos será o procedemento a empregar cando sexa preciso realizar unha selección das entidades concertantes en función das limitacións orzamentarias ou do número e características das prestacións susceptibles de concerto.

3. Nos concertos de adhesión as entidades que teñan a autorización ou cumpran con réxime de control ao que estean sometidas ou, no seu caso, contén coa acreditación requirida e cumpran os requisitos de admisión poderán adherirse ó sistema durante toda a vixencia do concerto. Coa periodicidade que estableza a convocatoria o órgano competente efectuará a asignación de prazas, prestacións ou programas atendendo prioritariamente á elección da persoa usuaria.



Artigo 10. *Expediente dos concertos sociais*

1. A celebración de concertos por parte das administracións públicas requirirá a previa tramitación do correspondente expediente, que se iniciará polo órgano que o promova motivando a necesidade do mesmo por ausencia de oferta pública propia.

2. Ao expediente incorporaranse os seguintes documentos:

a) Memoria xustificativa da necesidade do concerto e da concorrencia das circunstancias que fagan necesario acudir á convocatoria dun concerto social, a idoneidade desta forma de xestión polo contido concreto da prestación ou polos criterios de planeamento dos recursos do sistema público de servizos sociais para garantir o acceso ao mesmo dos usuarios.

b) Informe da insuficiencia de medios no caso de prestación de servizos.

c) Prego técnico no que se fixarán as condicións técnicas e materiais do concerto, en particular, aqueles elementos técnicos, recursos materiais e humanos e aspectos organizativos e de funcionamento adicionais ou por riba dos mínimos establecidos na normativa sectorial de aplicación para a correspondente autorización ou acreditación de funcionamento.

d) Estudo de costes, elaborado a instancia do órgano instrutor, que calculará o prezo do concerto tendo en conta a fiscalidade dos servizos e os costes, variables, fixos e permanentes do servizo.

e) Informe da asesoría xurídica sobre a adecuación á normativa da concertación social.

Artigo 11. *Inicio e convocatoria do concerto*

1. Os procedementos de concerto social iniciaranse de oficio mediante resolución da persoa titular da consellería competente en materia de servizos sociais.

2. As resolucións de convocatorias de concertos sociais publicaranse no *Diario Oficial de Galicia* e deberán ter o contido mínimo seguinte:

a) Necesidade administrativa a satisfacer.

b) Obxecto do concerto social.

c) Modalidade de concertación.

d) Réxime económico do acordo (orçamento, distribución en anualidades, crédito orzamentario ao que se imputa o gasto e prezo ou módulos económicos).

e) Duración do concerto e posibilidade de prórrogas.



- f) Requisitos que deben cumprir as entidades para poder presentarse ao procedemento de concertación.
- g) Prazo e lugar de presentación de solicitudes.
- h) Documentación que debe acompañar á solicitude.
- i) Órganos competentes para a tramitación e resolución do procedemento.
- j) Procedemento do concerto social.
- k) Prazo de resolución e publicación.
- l) Recursos contra a resolución.
- m) Criterios de selección e preferencia
- n) Composición da comisión de valoración
- o) Condicións técnicas e materiais da prestación obxecto do concerto.
- p) A indicación da existencia da obriga da subrogarse como empregador en determinadas relacións laborais, cando esta veña imposta pola normativa laboral.
- q) Aspectos relativos á execución do concerto, dereitos e obrigas das partes, necesidade de constitución de garantías, referencia ao réxime de pagos, modificacións, resolución e extinción do concerto.
- r) Calquera outra referencia que resulte convinte incluír.

3. Contra a resolución da convocatoria, os interesados poderán interpoñer recurso potestativo de reposición no prazo dun mes a contar dende o día seguinte ó da publicación, que caberá fundar en calquera dos motivos de nulidade ou anulabilidade previstos nos artigos 47 e 48 da Lei 39/2015, do 1 de outubro, conforme establece o artigo 112.1 de dita lei, sen prexuízo do recurso que, no seu caso, se poida interpoñer contra a resolución que poña fin ao procedemento.

Artigo 12. *Presentación de solicitudes*

1. As solicitudes de participación na convocatoria de concerto social deberán presentarse obrigatoriamente por medios electrónicos a través do formulario normalizado dispoñible na sede electrónica da Xunta de Galicia. A presentación da solicitude supón a aceptación incondicionada do solicitante da totalidade do contido da dita convocatoria, sen excepción ou reserva algunha.
2. A convocatoria do concerto social establecerá o prazo no que as entidades prestadoras de servizos sociais poderán presentar as solicitudes.



Para os procedementos de asignación de concertos este prazo non poderá ser inferior a un mes contado a partir do día seguinte ao da publicación da convocatoria.

Nos concertos de adhesión o prazo de presentación de solicitudes permanecerá aberto ao longo da duración do concerto e no caso de prorrogarse este abrirase un novo prazo de solicitudes polo tempo da prórroga. Nestes casos os anuncios de prórroga deberán publicarse no *Diario Oficial de Galicia*.

3. Todas as entidades que estean interesadas en participar nun concerto social deberán facelo obrigatoriamente por medios electrónicos a través da sede electrónica da Xunta de Galicia.

Artigo 13. *Criterios de preferencia e selección*

1. Para a formalización de concertos terán prioridade as entidades sen ánimo de lucro, cando existan análogas condicións de efectividade, calidade e rendibilidade social. En todo caso, garantirase a libre concorrència e o respecto dos principios de igualdade de trato, de non discriminación e de transparencia.

En análogas condicións de efectividade, calidade e rendibilidade social, ou en ausencia de entidades de iniciativa social, a administración poderá concertar co resto de entidades de iniciativa mercantil.

2. Nos procedementos de asignación de concertos poderán establecerse criterios para a selección das entidades e servizos, coa finalidade de acadar unha valoración que sirva para establecer unha orde de prelación para concertar. Os criterios deberán quedar determinados na convocatoria de cada procedemento e poderán basearse nos seguintes:

- a) A continuidade das persoas usuarias atendidas e o seu arraigo no entorno de atención social.
- b) A elección das persoas usuarias nos casos en que proceda.
- c) A implantación da entidade na localidade onde se vaia a prestar o servizo.
- d) A valoración das persoas usuarias do servizo recibido, se este xa fose prestado con anterioridade.
- e) As certificacións de calidade .
- f) A experiencia acreditada na xestión e mellora dos servizos.
- g) A continuidade na atención ou atención prestada.
- h) O cumprimento por parte da entidade da normativa sectorial de aplicación e das obrigas derivadas da formalización doutros concertos.



i) O cumprimento das obrigas en material social e laboral establecidas no ordenamento xurídico e as melloras que afecten ao persoal encargado da execución das prestacións obxecto do concerto.

j) A formación e experiencia do persoal que prestará o servizo que se vai a concertar. Nos concertos de atención a infancia deberase ter en consideración este criterio, valorando a experiencia na atención a menores do cadro de persoal e a súa formación específica nos dereitos da infancia, maltrato infantil e atención a menores vítimas de violencia de xénero e abuso sexual.

k) A incorporación ao cadro de persoal que vai a executar o servizo obxecto do concerto dunha porcentaxe de traballadores con discapacidade superior á que lle impoña a normativa ou a de persoas con dificultades de acceso ao mercado de traballo. Na convocatoria do concerto poderá establecerse as porcentaxes que resulten máis relevantes en relación co ámbito social no que se presten os servizos.

l) O cumprimento das obrigas e a acreditación da implantación de medidas de igualdade e conciliación recollidas na Lei orgánica 3/2007, do 22 de marzo, de igualdade efectiva de mulleres e homes, no Decreto legislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade e na Lei 3/2011, do 30 de xuño, de apoio á familia e á convivencia de Galicia.

m) Calquera outros criterios que resulten relevantes para valorar a idoneidade e capacidade das entidades.

3. Para os concertos de adhesión, nos casos en que a elección das persoas usuarias non sexa posible ou suficiente para a asignación das prazas, prestacións ou programas, estableceranse criterios secundarios baseados nos principios recollidos neste decreto, en especial os de continuidade na atención e arraigo no entorno.

Artigo 14. *Tramitación de solicitudes*

1. O órgano competente para a tramitación do procedemento será a dirección xeral promotora do concerto, a través dos órganos de dirección dependentes da mesma.

2. O órgano instrutor realizará de oficio cantas actuacións considere necesarias para comprobar que a solicitude reúne os requisitos esixidos e se acompaña da documentación preceptiva.

Artigo 15. *Comisión de valoración*

1. Nas convocatorias de concerto social crearase unha comisión de valoración que será a encargada de verificar o cumprimento das condicións impostas ás



entidades para concertar e, no seu caso, valorar as solicitudes de acordo cos criterios de selección.

2. A comisión de valoración estará composta por persoal da consellería con competencias en materia de servizos sociais, preferentemente persoal funcionario de carreira, e con coñecementos e experiencia na materia.

Na convocatoria do concerto social recollerase a composición da comisión de valoración.

3. Nos procedementos de asignación de concertos, a comisión de valoración determinará aquelas entidades que cumpran os requisitos para concertar e elaborará un listado ordenado, de acordo coas puntuacións obtidas, asignando o número de prazas ou servizos correspondentes a cada participante.

4. Nos concertos de adhesión, a comisión de valoración determinará se as entidades solicitantes cumpren os requisitos para a súa admisión no sistema.

5. Na organización e funcionamento da comisión de valoración aplicarase o disposto, en materia de órganos colexiados, na Lei 40/2015, do 1 de outubro, do réxime xurídico do sector público e na Lei 16/2010, do 17 de decembro, de organización e funcionamento do sector público autonómico de Galicia.

Artigo 16. *Resolución de concertación*

1. A resolución dos procedementos de concertación correspondelle á persoa titular da consellería con competencias en materia de servizos sociais que poderá delegar a competencia na persoa titular do órgano de dirección competente no ámbito dos servizos sociais a concertar.

2. O prazo máximo para resolver e notificar a resolución de concertación será de tres meses a contar dende a publicación da convocatoria no *Diario Oficial de Galicia*. Este prazo poderá ser ampliado, de acordo coa normativa sobre o procedemento administrativo, por un prazo máximo doutros tres meses.

3. Nos concertos de adhesión, nos que as entidades poden presentarse durante a vixencia do concerto, o prazo do número anterior contarase a partir da data de presentación da solicitude na sede electrónica da Xunta de Galicia.

4. Transcorrido o prazo establecido en cada caso sen ditarse e notificarse resolución, a entidade poderá entender desestimada a súa pretensión por silencio administrativo.

Artigo 17. *Publicidade dos concertos*

1. Nos procedementos de concerto social rexen os principios de publicidade e transparencia polo que se dará publicidade aos mesmos, tanto na tramitación do procedemento como no seguimento da súa execución.



2. A resolución de concertación será publicada no *Diario Oficial de Galicia*, tendo a publicación os efectos da notificación, consonte o artigo 45 da Lei 39/2015, do 1 de outubro, do procedemento administrativo común das administracións públicas.

Sen prexuízo do indicado no número precedente, de forma complementaria poderase efectuar a notificación da resolución a todas as entidades solicitantes por medios electrónicos, nos termos previstos na normativa reguladora do procedemento administrativo común.

3. Nos concertos de adhesión deberán publicarse as resolucións de prazas, prestacións ou programas.

4. Cada concerto social será obxecto de publicidade activa durante a súa vixencia. A estes efectos, os órganos competentes para a súa tramitación e xestión, deberán ter actualizada no portal de transparencia da consellería competente a seguinte información:

a) Convocatoria do concerto.

b) Informe de insuficiencia de medios.

c) Resolución de concertación.

d) Prezos unitarios ou módulos económicos actualizados.

e) Relación de concertos formalizados con indicación das entidades asinantes, obxecto, duración, prórrogas eventuais e efectivas, valor estimado e importe, servizos complementarios autorizados e o seu prezo.

Nos concertos de adhesión deberá publicarse a relación de entidades admitidas no sistema e a asignación de prazas, prestacións ou programas. A información actualizarase coa periodicidade na que se realice a asignación de prazas, prestacións ou programas.

Artigo 18. *Recursos*

As resolucións dos procesos de asignación de concertos e as resolucións de admisión e asignación de prazas, prestacións ou programas nos concertos de adhesión poñerán fin a vía administrativa. Contra as mesmas poderase interpoñer recurso potestativo de reposición no prazo dun mes a contar dende o día seguinte a publicación ou ben interpoñer directamente recurso contencioso-administrativo, nos prazos e forma establecidos na lei reguladora da xurisdición contencioso-administrativa.



Artigo 19. *Formalización*

1. Os concertos sociais, resultado dos procedementos de asignación de concertos ou da asignación de prazas, prestacións ou programas dentro dos concertos de adhesión, formalizaranse mediante un documento administrativo dentro dos 15 días seguintes a publicación das resolucións de concertación.
2. O documento de formalización do concerto será subscrito, en representación da administración, pola persoa titular da consellería competente en materia de servizos sociais ou na persoa en que delegue.
3. O concerto perfeccionase coa súa formalización e non se poderá iniciar a súa execución sen terse efectuado esta previamente.
4. Efectuada a formalización, a entidade concertada estará obrigada a prestar ás persoas usuarias os servizos sociais nas condicións establecidas na normativa sectorial aplicable, na resolución da convocatoria do concerto social e, no seu caso, no proxecto técnico presentado pola entidade.
5. O documento de formalización dos concertos sociais conterá as seguintes mencións:
 - a) Órgano administrativo e entidade prestadora de servizos sociais que formalizan o concerto, con referencia a súa competencia e capacidade, respectivamente.
 - b) Antecedentes administrativos do concerto social
 - c) Definición dos servizos que constitúen o obxecto do concerto, con indicación das súas características, do seu número, referencia ao prego técnico do concerto e, no seu caso, ao proxecto técnico presentado pola entidade.
 - d) Importe a aboar pola administración, con expresión do réxime de pagos previsto.
 - e) No seu caso, posibilidade de revisión de prezos ou módulos económicos.
 - f) Réxime de participación, no seu caso, das persoas usuarias no custo do servizo, de acordo coa normativa de aplicación.
 - g) Prazos totais e parciais de duración do concerto, posibilidade de prórroga, causas de modificación, revisión e extinción.
 - h) Referencia á posibilidade e condicións para realizar prestacións non gratuítas e servizos complementarios, con indicación, no seu caso, dos importes destas.
 - i) Medios, recursos materiais e humanos necesarios para garantir o cumprimento das condicións establecidas para o servizo obxecto do concerto.
 - j) Garantía definitiva, no seu caso, constituída pola entidade concertada.
 - k) Dereitos e obrigas da entidade concertada con especial referencia a aquelas que atinxan ás condicións de prestación do servizo, aos dereitos das persoas usuarias, á obriga de dispoñer dun seguro de responsabilidade civil para cubrir as contingencias que se poidan producir na prestación do servizo, á obrigatoriedade de continuar prestando os servizos concertados de existir usuarios que deban ser



atendidos no caso de finalización ou extinción do concerto e ás obrigas laborais e sociais co persoal contratado para a prestación do servizo.

l) Condicións e limitacións da subcontratación e excepcións á prohibición de cesión do concerto.

m) Calquera outra cláusula que a administración estime convinte establecer en cada caso, de conformidade coa convocatoria de concerto e os pregos técnicos do mesmo.

6. Poderase subscribir un único concerto para a reserva e ocupación de prazas en varios centros ou para a xestión integral dunha pluralidade de prestacións ou servizos cando todos eles dependan dunha mesma entidade titular e exista unha necesaria complementariedade ou continuidade entre eles. Esta subscrición farase cando a administración considere que deste xeito se acada unha maior eficacia ou eficiencia na prestación e xestión dos servizos. No documento de formalización deberanse singularizar aqueles aspectos propios e diferenciais de cada centro, prestación ou servizo.

7. Cando por causas imputables a entidade concertada non se tivese formalizado o concerto social, a administración poderá acordar a resolución do mesmo e a incautación da garantía, no caso de terse constituído.

8. Se as causas da non formalización fosen imputables á administración, indemnizarase á entidade dos danos e prexuízos que a demora lle puidera ocasionar.

CAPÍTULO IV **Execución**

Artigo 20. Obrigas da entidade concertada

1. A formalización dun concerto obrigará a entidade concertada a:

a) Organizar e prestar o servizo con estrita suxeición ao réxime xurídico de aplicación, de acordo coas características establecidas no concerto e coa continuidade e calidade convida.

b) Admitir á utilización do servizo a toda persoa usuaria remitida pola administración concertante e garantir a súa prestación nas condicións que foron establecidas, de acordo cos principios de igualdade e non discriminación.

c) Prestar ás persoas usuarias de forma gratuíta os servizos establecidos no concerto, excepto cando estivese previsto a participación económica das persoas usuarias no custo do servizo.

d) Respetar os dereitos das persoas usuarias recollidos no ordenamento xurídico e no réxime xurídico do servizo. En particular, cando se dea unha relación xurídica privada de prestación dos servizos coas persoas usuarias as entidades



concertadas garantirán a estas os dereitos recollidos no artigo 38 Lei 1/2015, do 1 de abril, de garantía da calidade dos servizos públicos e da boa administración.

e) Indemnizar polos danos que se causen a terceiros como consecuencia das operacións que requira o desenvolvemento do concerto, excepto cando o dano sexa producido por causas imputables á Administración.

A estes efectos a entidade estará obrigada a subscribir un seguro de responsabilidade civil para cubrir as continxencias que se poidan producir pola prestación do servizo.

f) Manter o servizo público conforme ao que, en cada momento e segundo o progreso da ciencia, dispoña a normativa técnica, ambiental, de accesibilidade e eliminación de barreiras e de seguridade das persoas usuarias que resulte de aplicación.

g) Dar a coñecer a condición de entidade concertada mediante a difusión na documentación e publicidade das actuacións obxecto do mesmo. A entidade disporá tamén dun rótulo, no lugar ou centro onde se presten os servizos, no que se identifique que o centro ou servizo está concertado coa Xunta de Galicia ou que conta con prazas concertadas coa Xunta de Galicia.

h) Comunicar á administración calquera cambio ou variación que se produza na prestación dos servizos, en especial os relacionados co centro no que se presten e os recursos humanos empregados.

i) Facilitar as labores de control e inspección do cumprimento do concerto, en particular, poñendo a disposición da administración toda a información económica, fiscal, laboral, técnica e asistencial ou de calquera outra clase que sexa precisa para este fin, con suxeición á lexislación en materia de protección de datos e a restante normativa aplicable.

j) Someterse ás actuacións de control financeiro que corresponda ós órganos competentes da administración en relación cos fondos públicos aportados para o financiamento dos concertos sociais.

k) Comunicar á administración concertante calquera subvención, axuda ou aportación privada recibida relacionada coa prestación dos servizos recollidos nos concertos sociais.

l) Subministrar á Administración, logo de requirimento, toda aquela outra información necesaria para o cumprimento por esta das obrigas previstas na Lei 1/2016, do 18 de xaneiro, de transparencia e bo goberno.

m) Cumprir coas disposicións vixente en materia laboral, de seguridade social, de seguridade e saúde laboral e igualdade de xénero. Ademais deberá proporcionarlle aos seus traballadores e traballadoras un traballo de calidade e



estable, protexelos fronte aos accidentes e riscos laborais e promover condicións de conciliación familiar e laboral e de igualdade de xénero.

n) A cumprir as disposicións vixentes en materia fiscal, de integración social de persoas con discapacidade, de prevención de riscos laborais, de protección do medio ambiente que estableza a normativa vixente, os convenios colectivos que sexan de aplicación e as recollidas na convocatoria do concerto social. En particular, deberán cumprir coa cota de reserva de postos de traballo para persoas con discapacidade recollida no Real decreto lexislativo 1/2013, do 29 de novembro, polo que se aproba o texto refundido da Lei xeral de dereitos das persoas con discapacidade e de inclusión social.

ñ) A cumprir coa obriga de subrogarse como empregador en determinadas relacións laborais cando esta lle veña imposta por unha norma legal, un convenio colectivo ou un acordo de negociación colectiva de eficacia xeral.

o) As entidades concertada que poidan ter contacto con menores estarán obrigadas ó cumprimento do establecido na Lei orgánica 1/1996, do 15 de xaneiro, de protección xurídica do menor, modificada pola Lei orgánica 8/2015, do 22 de xullo, de modificación do sistema de protección á infancia e á adolescencia, pola Lei 26/2015, do 28 de xullo, de modificación do sistema de protección á infancia e adolescencia e polo o Real decreto 1110/2015, do 11 de decembro, polo que se crea e regula a organización e funcionamento do Rexistro central de delinquentes sexuais.

p) O persoal asignado á prestación do concerto dependerá exclusivamente da entidade concertada, a cal terá todos os dereitos e deberes inherentes a súa calidade de empregador respecto do mesmo, sendo a Administración concertante de todo allea ás referidas relacións laborais. En ningún caso poderá alegarse dereito algún polo referido persoal en relación coa Administración concertante, nin esixirse a esta responsabilidades de calquera clase, como consecuencia das obrigas existentes entre a entidade concertada e os seus empregados.

q) A entidade concertada facilitará que as persoas usuarias podan formular suxestións e queixas sobre a prestación do servizo concertado. Podendo presentalas ante a administración ou ben ante a propia entidade concertada. A estes efectos, existirá un libro de reclamacións no que as persoas usuarias e quen as represente legalmente poderán facer constar as queixas que estimen pertinentes. A entidade concertada deberá remitir as suxestións e queixas recibidas á administración.

r) A entidade concertada manterá absoluta confidencialidade e reserva sobre calquera dato que puidera coñecer con ocasión da execución do concerto social, especialmente os de carácter persoal, que non poderá copiar ou utilizar con outra finalidade, nin tampouco ceder a outros nin sequera a efectos de conservación, quedando obrigada a respectar na súa integridade a Lei orgánica 3/2018, do 5



de decembro, de protección de datos persoais e garantía dos dereitos dixitais e o Regulamento (UE) 2016/679 do Parlamento Europeo e do Consello, do 27 de abril de 2016, así como todas as disposicións que en materia de protección de datos se encontren en vigor na data de formalización do concerto ou que puideran estalo durante a súa vixencia.

s) Calquera outra prevista na normativa que, con carácter xeral ou específico, sexa de aplicación, no réxime xurídico do servizo ou na convocatoria do concerto social.

Artigo 21. *Incumprimento das obrigas por parte da entidade concertada*

1. As convocatorias de concertos sociais poderán prever, sen prexuízo de que conorra causa de extinción do concerto, penalidades para os casos de cumprimento defectuoso do servizo ou prestación obxecto do mesmo. As penalidades deberán ser proporcionais á gravidade do incumprimento e a contía de cada unha delas non poderá ser superior ó 10 por cento do importe do concerto.

2. Nos casos nos que, debido o cumprimento defectuoso da entidade concertada ou ó incumprimento das condicións esenciais do concerto, a administración tivese que intervir, en defensa dos dereitos das persoas usuarias, poderá esixirille a entidade os danos e prexuízos sufridos.

3. Tanto as penalidades como as indemnizacións por danos e prexuízos impostas pola administración, serán inmediatamente executivos e faranse efectivos mediante deducións nos pagamentos que se deben facer a entidade e, no seu caso, sobre a garantía esixida.

Artigo 22. *Obrigas da administración concertante*

1. A administración concertante está obrigada a aboar á entidade concertada o prezo estipulado dentro dos trinta días seguintes a data de aprobación dos documentos que acrediten a conformidade cos servizos prestados, de acordo coa forma de pagamento recollida na convocatoria do concerto.

2. Nos concertos sociais de prazas, a administración concertante está obrigada a cumprir cos compromisos, que poidan establecerse na convocatoria do concerto, en relación coa garantía dun número mínimo de prazas ocupadas ou co pagamento pola reserva de prazas sen ocupar.

3. A administración concertante está obrigada a procurar respectar as preferencias das persoas usuarias na elección do centro e prestador do servizo, en función da dispoñibilidade dos recursos e as necesidades técnicas ou asistenciais que para caso determinen os profesionais da administración.



4. A administración deberá ter informada á entidade concertada de calquera circunstancia que afecte de xeito relevante ao concerto formalizado e que puidera supoñer a súa modificación, renovación ou resolución, debendo facelo cun mínimo dun mes de antelación á data na que se produzan as circunstancias en cuestión.

Artigo 23. Incumprimento das obrigas por parte da administración

1. Se a administración se demorase no pagamento e incumprise o prazo establecido no artigo 22.1 deberá aboar á entidade concertada, a partir do cumprimento do dito prazo, os intereses de demora e a indemnización por custos de cobro nos termos previstos na Lei 3/2004, do 29 de decembro, pola que se establecen medidas de loita contra a morosidade nas operacións comerciais.

2. Se a administración incumprise o compromiso de prazos mínimas ocupadas deberá aboar á entidade concertada o prezo ou módulo económico como se ese número de prazos estivesen efectivamente ocupadas, salvo que na convocatoria do concerto se estableza outro sistema de indemnización para estes casos.

Artigo 24. Servizos ou prestacións complementarias

1. Os servizos ou prestacións complementarias ás que constitúen o obxecto do concerto social non poderán ter carácter lucrativo e deberán ser voluntarias e non discriminatorias para as persoas usuarias do concerto.

2. A administración concertante deberá autorizar os servizos ou prestacións complementarias con anterioridade ó comezo das mesmas.

3. A autorización dos servizos ou prestacións complementarias poderase realizar con anterioridade á formalización do concerto social ou durante a execución deste, mediante solicitude da entidade concertada.

4. Para acadar a autorización deberase comprobar que os servizos ou prestacións sexan efectivamente complementarios e non os propios do concerto social, nin supoñan unha inferior intensidade, volume ou perda de calidade deste último.

Na documentación que a entidade aporte con esta finalidade deberá constar unha memoria xustificativa e económica do cumprimento dos requisitos esixidos para a súa autorización.

5. O órgano competente poderá elaborar e publicar, para cada concerto social, un catálogo de servizos e prestacións complementarias non gratuítas con prezos de referencia en función dos costes de mercado e dos establecidos en autorizacións previas.



Artigo 25. *Limitacións á subcontratación e cesión de servizos concertados*

1. Na convocatoria de cada concerto social estableceranse as limitacións precisas de subcontratación, podendo fixar unha porcentaxe respecto do prezo do concerto. En todo caso, só se poderán subcontratar aquelas prestacións accesorias ou complementarias do obxecto principal do concerto. A estes efectos, nos servizos asistenciais de atención diúrna ou nocturna, poderase admitir a subcontratación total do servizo de transporte.

2. Queda prohibida a cesión, total ou parcial, dos servizos obxecto do concerto, excepto cando a entidade concertada sexa declarada en concurso de acredores e non quede garantida a continuidade da atención das persoas usuarias, con autorización expresa e previa da administración que adoptará as medidas precisas para garantir a continuidade e calidade do servizo.

Artigo 26. *Inspección e control*

1. Sen prexuízo das competencias de inspección en materia de servizos sociais da administración da Xunta de Galicia, as entidades concertadas estarán sometidas ás actuacións de control e vixilancia que leve a cabo o órgano competente para asegurar o correcto cumprimento do concerto subscrito.

A estes efectos, na convocatoria de cada concerto determinarase a xustificación documental que, xunto coa facturación ou coa periodicidade que se considere, deberán achegar as entidades concertadas.

2. Os servizos concertados estarán sometidos aos procesos de inspección e controis sanitarios, económicos e administrativos que correspondan en razón á natureza do servizo e da utilización do financiamento público.

CAPÍTULO V

Modificación e prórroga

Artigo 27. *Modificación do acordo de concertación*

1. Unha vez formalizado o concerto social poderanse introducir modificacións só cando estas obedezan a razóns de interese público debidamente xustificadas e derivadas das necesidades de atención ás persoas usuarias.

As modificacións só serán posibles cando non afecten aos requisitos legais para a prestación dos servizos, non supoñan unha merma na calidade do servizo e, de implicar un coste, exista crédito adecuado e suficiente para poder asumilo.

2. O procedemento de modificación poderase iniciar de oficio, debendo dar audiencia a parte interesada, ou a instancia de parte mediante proposta da entidade concertada. Estes extremos deberán quedar documentados, xunto co informe da Asesoría xurídica e os demais informes que procedan, con carácter previo á formalización da modificación.



3. O órgano competente para autorizar a modificación será o mesmo que formalizou o concerto social coa entidade afectada.

Artigo 28. Modificación do número de prazas ou de servizos concertados

1. A administración concertante, de acordo coas dispoñibilidades orzamentarias, poderá modificar o número de prazas ou unidades de servizos obxecto do concerto durante a vixencia do mesmo. Esta modificación deberá estar xustificada na demanda dos servizos polas persoas que teñan ou puideran ter dereito a estes.

2. Nos acordos formalizados a partir de procedementos de asignación de concertos a porcentaxe de incremento do número de prazas ou servizos de cada concerto deberá respectar o límite máximo recollido na convocatoria, que nunca poderá exceder o 25%.

3. Poderase minorar o número de prazas ou servizos concertados nos casos en que non exista suficiente demanda para a súa cobertura. Nos casos en que esta insuficiencia da demanda sexa prolongada, durante tres meses consecutivos ou de seis meses nun período de doce, a administración poderá impoñer unilateralmente a minoración do número de prazas afectadas.

4. Nos concertos de adhesión a asignación de prazas non terá a condición de modificación do concerto, non obstante, deberase documentar, mediante as correspondentes resolucións ou acordos, e notificar a entidade concertada as variacións no número de prazas ocupadas.

Artigo 29. Modificación das condicións técnicas

1. As condicións recollidas nos pregos técnicos do concerto social poderán ser modificadas como consecuencia de cambios normativos que lles afecten ou da revisión das mesmas por parte da administración concertante.

2. No expediente de modificación deberá constar unha memoria económica na que se avalíe o impacto no cambio das condicións técnicas nos prezos unitarios ou módulos económicos. De ter incidencia nestes últimos deberase proceder ao seu reaxuste.

3. Se fose a administración a que decidise revisar as condicións técnicas do concerto os cambios deberán estar motivados na mellor ou máis axeitada prestación dos servizos mediante informe dos técnicos do órgano competente.

Deberáselle dar audiencia ás entidades concertadas afectadas para que poidan formular propostas e alegacións á revisión proposta.

A modificación das condicións técnicas deberá afectar a todas as prazas ou unidades de servizos da mesma tipoloxía, sen que se poida facer distinción en función da entidade concertada.



Artigo 30. *Sucesión da entidade concertada*

1. O cambio da titularidade do servizo concertado, xa sexa por sucesión da entidade concertada ou pola cesión do concerto formalizado, terá a consideración de modificación do concerto social.
2. Poderase producir a sucesión da entidade concertada cando a primeira se fusione ou transforme noutra.
3. Nos casos de sucesión da entidade concertada o concerto continuará vixente coa entidade que a suceda, sempre que esta continúe reunindo os requisitos esixidos para formalizar o concerto social.

A entidade sucesora deberá subrogarse nos dereitos e obrigas derivados do concerto que estivesen vixentes no momento da sucesión.

4. Se non fose posible concertar coa entidade sucesora por non cumprir esta cos requisitos esixidos no concerto, considerarase a todos os efectos un suposto de resolución do concerto por culpa da entidade concertada.
5. Ós efectos anteriores a entidade concertada deberá comunicar a administración competente a circunstancia que se teña producido.

Artigo 31. *Prórroga dos concertos sociais*

1. Os concertos sociais poderán prorrogarse por mutuo acordo das partes, segundo o establecido na súa convocatoria e dentro dos límites temporais recollidos no artigo 8.
2. A formalización da prórroga só será posible cando a administración competente xustifique a necesidade de continuar atendendo á demanda do servizo, comprobe que a entidade concertada está prestando o concerto de conformidade, segue cumprindo os requisitos esixidos e existan consignacións orzamentarias axeitadas e suficientes para asumir o compromiso de gasto.
3. O procedemento deberá iniciarse de oficio, por parte do órgano administrativo competente, coa antelación suficiente para que poida continuar o concerto que, en todo caso, deberá ser dous meses antes do seu remate.
4. Ademais de recadar o consentimento conxunto de ambas partes á prórroga, a entidade concertada deberá acreditar que segue cumprindo os requisitos esixidos para concertar.
5. A prórroga deberá formalizarse dentro dos 15 días seguintes á notificación da resolución.



CAPÍTULO VI **Extinción do concerto social**

Artigo 32. *Causas de extinción do concerto social*

Os concertos para a prestación dos servizos sociais extinguíranse polas seguintes causas:

- a) O cumprimento do concerto.
- b) A resolución do concerto

Artigo 33. *Cumprimento dos concertos*

O concerto entenderase cumprido pola entidade concertada cando este fose realizado, de acordo cos termos do mesmo, na totalidade da prestación e teña finalizado o seu período de vixencia.

Artigo 34. *Extinción do concerto por resolución*

1. Serán causas de resolución do concerto social as seguintes:

- a) O mutuo acordo entre a administración concertante e a entidade concertada.
- b) A non formalización do concerto ou da súa prórroga no prazo establecido.
- c) A extinción da personalidade xurídica da entidade concertada.
- d) A declaración de concurso de acredores da entidade concertada ou a declaración de insolvencia en calquera procedemento.
- e) O cese voluntario, coa previa autorización da administración, da entidade concertada na prestación do servizo.
- f) A inviabilidade económica da entidade titular do concerto, constatada por informes de auditoría externa, cando lle sexan solicitados pola administración.
- g) A revogación da acreditación, homologación ou autorización administrativa da entidade concertada que a habilitaba para a prestación do servizo concertado.
- h) O incumprimento das obrigas cualificadas como esenciais no concerto ou o incumprimento dos estándares e parámetros de calidade esixidos no mesmo, sempre que o incumprimento sexa imputable a entidade concertada.
- i) O incumprimento das obrigas relativas á seguridade das instalacións do centro.
- j) A comisión dalgunha infracción moi grave das tipificadas no artigo 82 da Lei 13/2008, do 3 de decembro, de servizos sociais de Galicia ou recibir algunha das sancións recollidas no artigo 83.2 de dita norma.



k) O incumprimento grave da lexislación en materia fiscal, laboral, de Seguridade Social e da integración social de persoas con discapacidade e prevención de riscos laborais.

l) Negarse a atender ás persoas usuarias derivadas pola administración concertante.

m) Prestar servizos como se fosen concertados coa administración cando isto non sexa así.

n) Solicitar o pagamento ás persoas usuarias de servizos ou prestacións complementarias cando ditos servizos non fosen autorizados pola administración concertante.

o) O incumprimento dos límites á subcontratación e cesión de servizos concertados recollido no artigo 25 deste Decreto.

p) A ausencia de demanda para a cobertura do servizo prestado de xeito relevante e prolongado, xa sexa para a totalidade das prazas ou servizos ou para un número significativo que faga inviable economicamente o mantemento do servizo.

q) A imposibilidade de continuar prestando o concerto nos termos inicialmente acordados ou facelo sen ocasionar un prexuízo o interese público, cando non sexa posible a modificación do concerto dentro los límites establecidos no mesmo.

r) A demora no cumprimento das obrigas económicas por parte da administración concertante por prazo superior a catro meses, salvo que se fixe outro inferior.

s) A suspensión por causa imputable a administración concertante da iniciación do concerto por prazo superior a seis meses dende a data sinalada para o comezo, salvo que se fixe un prazo inferior.

t) O desistimento ou suspensión do concerto por prazo superior a seis meses acordado pola administración concertante, salvo que se fixe outro inferior.

u) O resto de causas establecidas na normativa sectorial de aplicación ó concerto ou as recollidas expresamente na convocatoria ou documento de formalización deste.

2. A resolución dos concertos por mutuo acordo das partes só poderá ter lugar cando medien razóns de interese público, que fagan innecesario ou inconveniente a continuación do concerto, e non concorra outra causa de resolución que sexa imputable á entidade concertada.



3. A entidade concertada poderá solicitar a resolución do concerto cando considere que a administración incorreu nalgunha das causas imputables a esta. Se a administración se negase á resolución do concerto a entidade estará obrigada a continuar prestando os servizos en tanto existan persoas usuarias que deban ser atendidas, sen prexuízo dos recursos que procedan.

4. Se a administración estimase que se produciu un incumprimento da entidade concertada que puidese ser causa de resolución do concerto iniciará un procedemento administrativo no que se deberá dar audiencia á entidade. Se procedese a resolución do concerto a administración deberá establecer a data na que terá efectos dita resolución para garantir a continuidade do servizo ás persoas usuarias.

Artigo 35. *Efectos da resolución*

1. Cando a resolución se produza por mutuo acordo, os dereitos das partes acomodaranse ao validamente estipulado por elas.

2. A resolución motivada por un incumprimento da administración determinará, con carácter xeral, o pagamento dos danos e prexuízos causados á entidade, tendo en conta os prezos ou módulos económicos vixentes no momento da resolución.

3. Cando a resolución do concerto teña lugar por incumprimento culpable da entidade concertada, a entidade deberá indemnizar a administración polos danos e prexuízos causados.

Independentemente da indemnización e das posibles responsabilidades administrativas, civís ou penais, de observase unha infracción da normativa en materia de servizos sociais poderase incoar o correspondente expediente sancionador.

CAPÍTULO VII **Réxime económico**

Artigo 36. *Financiamento dos concertos sociais*

1. Os servizos obxecto dos concertos sociais serán compensado cos prezos ou módulos económicos que se establezan para cada tipo de prestación.

2. A determinación dos prezos ou módulos económicos efectuarase de acordo co principio de eficiencia orzamentaria, mediante o estudo de costes ó que se refire o artigo 10.2.d).

Os cálculos deberán efectuarse en función dos prezos de mercado e tomando como base a análise de custos dunha entidade media, ben xestionada e adecuadamente equipada.



Os prezos ou módulos económicos resultantes compensarán como máximo os costes variables, fixos e permanentes estimados para o tipo de servizo.

3. Nas convocatorias dos concertos sociais darase transparencia ao cálculo dos prezos ou módulos mediante a fixación destes e o desglose do orzamento indicando os custos directos e indirectos calculados para a súa determinación.

Dentro desta desagregación de costes deberase facer unha indicación específica para os salarios das persoas que deban empregarse, de acordo con convenio laboral de referencia. Cando sexa posible a desagregación farase por xénero e categoría profesional.

Artigo 37. Revisión dos prezos ou módulos

1. Os prezos ou módulos económicos fixados na convocatoria do concerto poderán ser revisados:

a) cando se realice unha modificación do concerto, segundo o establecido no artigo 27, que teña incidencia nos custos do servizo.

b) cando se produza unha variación substancial nos custos do servizo respecto das condicións económicas do concerto.

2. A revisión de prezos ou módulos precisará dun informe do órgano directivo da administración proponente sobre os costes económicos do concerto, no que se evidencie a necesidade da revisión.

Para o cálculo das revisións deberase ter en conta as previsións recollidas na normativa en materia de desindexación. Nas actualizacións de prezos ou módulos económicos o carácter diferenciado da acción concertada excluíra a consideración do período de recuperación dos investimentos aplicable á modalidade contractual.

Cando os servizos concertados teñan unha estrutura de custos na que a man de obra sexa significativa, poderanse referenciar a actualización desta compoñente dos custos ás variacións económicas dos convenios colectivos sectoriais, nacionais, autonómicos e provinciais aplicables ó lugar de prestación dos servizos, coas limitacións que a normativa vixente estableza.

3. A revisión dos prezos ou módulos efectuarase, segundo proceda, no acordo de modificación ou mediante resolución ao efecto ditada polo órgano competente ao amparo da norma.

4. A frecuencia da revisión dos prezos ou módulos pola causa establecida no apartado b) do número 1 non poderá ser inferior a un ano natural.



Artigo 38. Incompatibilidade coa percepción doutros ingresos

O réxime de concertos será incompatible coas subvencións para o financiamento dos servizos ou prestacións obxecto destes.

Artigo 39. Pagamento do custo do concerto

1. A administración concertante tramitará mensualmente as ordes de pagamento polos servizos ou prestacións que correspondan, de acordo cos prezos ou módulos vixentes, previa presentación da documentación preceptiva por parte da entidade concertada.

2. Para o aboamento das compensacións económicas a entidade concertada deberá presentar, no prazo que se estableza dentro do mes seguinte á prestación dos servizos, a correspondente factura, unha relación das prazas, prestacións ou servizos prestados e a restante documentación que sexa esixible de acordo coa convocatoria do concerto.

A factura e demais documentación deberá presentarse de forma telemática a través do Sistema Electrónico de Facturación da Comunidade Autónoma de Galicia.

3. Para aqueles servizos que teñan unhas características especiais poderase establecer na convocatoria do concerto formas de facturación sobre as prazas ou servizos concertados en función da súa reserva e a súa situación de vacante ou non ocupación.

4. Cando as persoas usuarias participen no financiamento do servizo a súa contribución virá determinada pola administración concertante, de acordo coa normativa que ao respecto sexa de aplicación.

A entidade concertada facturará directamente ás persoas usuarias na forma e prazos establecidos pola administración, que deberá establecer os procedementos a seguir para os casos de falta de pagamento e reintegro de cantidades indebidamente percibidas.

5. Nos casos aos que se refire o número anterior, na facturación dos prezos ou módulos económicos a percibir polos servizos prestados a entidade concertada descontará á administración a participación das persoas usuarias.

En ningún caso a cantidade percibida pola entidade concertada, a través da participación das persoas usuarias e a achega da administración, poderá superar os prezos ou módulos económicos vixentes no concerto.

6. A administración concertante terá a obrigaçión de aboar o prezo dentro dos 30 día seguintes á data de aprobación dos documentos que acrediten a conformidade co disposto no concerto dos servizos prestados.



Artigo 40. *Reintegro de cantidades percibidas indebidamente*

A percepción indebida de cantidades por parte da entidade concertada conlevará a obriga do seu reintegro a administración ou persoa que as aboara. Cando o reintegro se efectuase a requirimento da administración daráselle audiencia á entidade e seguirase o procedemento que corresponda, sen prexuízo das posibles sancións e resolución do concerto.

Artigo 41. *Transmisión dos dereitos de cobro*

1. As entidades concertadas que teñan dereitos de cobro fronte á administración, poderán ceder os mesmos conforme a dereito.
2. Para a cesión dos dereitos de cobro seguiranse o mesmo procedemento e esixiranse os mesmos requisitos que os recollidos no artigo 200 da Lei 9/2017, do 8 de novembro, de contratos do sector público.

CAPÍTULO VIII

Conflictos e xurisdición

Artigo 42. *Resolución de conflitos*

As cuestións litixiosas derivadas da aplicación do réxime de concerto serán resoltas polo órgano competente da administración concertante, sen prexuízo de que, unha vez esgotada a vía administrativa, se poidan someter á xurisdición contencioso administrativa.

Disposición adicional primeira. *Tramitación anticipada*

Os concertos sociais regulados neste decreto poderán acollerse ao réxime de tramitación anticipada de expedientes de gasto, regulado na normativa de réxime financeiro e orzamentario da administración autonómica, de forma análoga ao establecido para os expedientes de gasto de contratación.

Disposición adicional segunda. *Diferenciación e complementariedade da modalidade contractual.*

O réxime de concerto social regulado neste decreto establececese como modalidade diferenciada dos instrumentos contractuais, en virtude da disposición adicional cuadraxésimo novena da Lei 9/2017, do 8 de outubro, de contratos do sector público, sendo, en todo caso, complementario e non excluínte destes, de acordo coa planificación e programación do sistema de servizos sociais.

Disposición transitoria primeira. *Transición ás primeiras convocatorias de concertos sociais*

1. As primeiras convocatorias de concertos sociais dos servizos que se atopan dentro do ámbito obxectivo desde decreto terán lugar segundo a planificación da



implantación e modalidades de xestión efectuada pola administración. Nesta liña tamén se deberán ter en conta o grao de concreción dos requisitos técnicos de cada servizo e a situación e duración dos instrumentos contractuais e de colaboración a través dos cales se estean prestando os servizos.

2. Estas convocatorias de concerto social realizaranse, cando sexa factible, para todo o ámbito xeográfico da comunidade autónoma e para a maior parte posible dos servizos obxecto de concerto que se estean prestando por outras fórmulas de provisión.

3 As fórmulas contractuais e de colaboración para a prestación dos servizos susceptibles de concerto social que estean vixentes na data de entrada deste decreto manterán dita vixencia e poderán continuar coexistindo de maneira complementaria aos concertos que sexan convocados.

4. Nas primeiras convocatorias de concertos sociais poderase ter en conta como criterio de preferencia, de acordo co principio de continuidade, as prazas ou servizos ocupados mediante contratos ou instrumentos de colaboración.

Disposición transitoria segunda. *Requisitos técnicos non regulados.*

En tanto non se produza o desenvolvemento regulamentario que defina as características técnicas dos servizos recollidos nas distintas carteiras susceptibles de ser prestados mediante concerto, ditas especificacións recolleranse no prego de condicións técnicas. Nestes casos, non se esixirá ás entidades inscritas o requisito de acreditación.

Disposición transitoria terceira. *Transparencia*

Para dar cumprimento ao principio de transparencia, en tanto no se efectúe o desenvolvemento da normativa nesta materia á figura do concerto social, a estes seranlle de aplicación os principios xerais sobre publicidade activa que recolle a Lei 1/2016, do 18 de xaneiro, coas obrigas específicas recollidas neste decreto.

Disposición derogatoria única. *Normas que se derrogan*

Quedan derogadas cantas disposicións ditadas de igual ou inferior rango se opoñan ao disposto neste decreto.

Disposición derradeira primeira. *Réxime supletorio*

No caso de dúbidas ou lagoas, para o non previsto neste decreto nin nas condicións establecidas para cada concerto, estarase para a execución destes ás regras e principios que da normativa en materia de contratación pública sexan compatibles con esta modalidade de xestión.



Disposición derradeira segunda. *Desenvolvemento normativo*

Facultase a persoa titular da consellería con competencias en materia de servizos sociais para ditar cantas disposición administrativas de carácter xeral así como actos e instrucións sexan precisas para o desenvolvemento deste decreto.

Disposición derradeira terceira. *Entrada en vigor*

A presente norma entrará en vigor aos 20 días da súa publicación no *Diario Oficial de Galicia*.